



## 大家出手做環保

新聞在報「細懸浮微粒」危害人體康健，臺中歸片茫茫。雲林縣麥寮、臺西和金門所在个空氣品質攏到位危害頭高等級个茄色。請大家出門愛注意，頭好愛戴嘴揸。專家嘛提出警告，地球个平均溫度若擱高兩度，到時上海即會變做海上，臺北、高雄嘛會沈落海底。不時睭著這款新聞，實在得人擘心操煩。

地球單單一粒定，環境係大家个，現時若毋出來保護，韶日會反悔。想著成過細漢時，莊下根本無垃圾愛漕，會用做糞个，漕落糞墩去絞肥。會用回收賣錢个，做一下撿淨淨，像塑膠袋、玻璃罐、農藥罐、鵝毛、雞毛、舊報紙這兜攏相爭撿。成過个人較散，細子無錢即去撿這兜物件，等一定个量即會用換麥芽糖好食。到時大人、細子提佢人自家个物件，抑係撿自家屋下鵝換毛落來个鵝毛去賣錢抑係換食个。遐分期待，遐分歡喜，一息息物件即會用得佢人真滿足暢歸日。

賣菜、賣魚个人用禾稈抑係鹹草枷物件穿起來抑係綑个。嘛有人用菜葉包，抑係用紙袋裝物件。所以成過个莊下無垃圾車，逐火灶攏隨人枷垃圾處理好好。毋過現時屋下有糞墩个越來越少，真多物件攏包裝過頭，塑膠袋滿仔位攏在用，真多物件攏毋會用拗糞。路脣不時有垃圾，特別係路脣个田頭苦憐，禾割起來个時有撿毋會淨个、撿毋會盡个垃圾。有人真無公德心，車歇青紅燈个時，歸杯檳榔汁對車底扒出來，破壞靚靚个草皮。晨早時，會睭著頭前个車枷車窗搖落來，枷塑膠袋、杯直接抨出來，破壞環境衛生。這兜攏係愛深加檢討个。

生活越好過，垃圾越愈多，現時若毋做，後日收惡果，大家做環保，地球正會好。返樸歸真，簡單生活正係成過个人得偲人个啟示。減少無必要个消費，減少污染。對生活內底加強環境教育个教導，養成好个慣勢，大家出手做環保，子孫代代好。

作者：李秉璋

### ☆詞彙學習☆

【細懸浮微粒】se<sup>ˊ</sup> hien<sup>ˊ</sup> poo<sup>ˊ</sup> bbi<sup>ˊ</sup> liab<sup>ˊ</sup>：漂

浮在空氣中類似灰塵的粒狀物。粒徑小於或等於 2.5 微米(μm)的粒子，稱為 PM<sub>2.5</sub>，對人體健康有害。

【嘴揸】zhe<sup>ˊ</sup> em<sup>ˊ</sup>：口罩。

【做糞】zoo<sup>ˊ</sup> bun<sup>ˊ</sup>：做成堆肥。

【糞墩】bun<sup>ˊ</sup> dun<sup>ˊ</sup>：放置堆肥的地方。

【絞肥】gau<sup>ˊ</sup> pui<sup>ˊ</sup>：將可腐爛的東西，如菜渣、樹葉等層層堆放澆水，使之腐爛熟成、變成堆肥的過程。

【散】san<sup>ˊ</sup>：窮。

【鹹草】heem<sup>ˊ</sup> coo<sup>ˊ</sup>：藺草。可分為鹹水草與淡水草。鹹水草長於海邊，品質較粗韌，用來綑綁貨物；淡水草則可當做編織草帽、草蓆的材料。

【拗糞】au<sup>ˊ</sup> bun<sup>ˊ</sup>：將可腐爛的東西，堆置做成堆肥。

【扒】dim<sup>ˊ</sup>：丟擲。

【靚靚】ziang<sup>ˊ</sup> ziang<sup>ˊ</sup>：漂亮、美麗。此處指草地整理得非常美麗。

【抨】piang<sup>ˊ</sup>：用手將東西直接丟出來。